



Represchentants da las quatter instituziuns purilas cun l'architect dal nov center da cumpetenza per purs: **Curdin Foppa, Barbara Buchli-Dönz, Claudio Müller, Michael Schumacher, Peter Nicolay, Hansjörg Hassler e Gion Capeder (da san.)**.

FOTO G. N. STGIER

# In edifizis per quatter instituziuns purilas

## Avertura dal center da cumpetenza per purs grischuns

DA GION NUTEGN STGIER / ANR

■ **En otg mais è vegnì constrü il nov bajetg che ha custà dus milliuns francs. Constrü è quel vegnì tenor las normas da minergia e tenor l'idea da l'architect Michael Schumacher da Cuira. Ils purs grischuns pon ussa far adiever da divers servetschs il medem mument.** Il 1998 è l'Arena grischuna a Cazas vegnida surdada al manaschi ed è dapi 13 onns il center per exposiziuns ed aucziuns da biestga. Il lieu en il Grischun central è quel lieu nua ch'ils purs da noss chantun s'entaupan repetidamain durant l'onn tar occurrenzas da l'agricultura. A partir dad oz ha Cazas anc dapli valur per ils purs dal Grischun cun avair avert il center da cumpetenza d'agricultura sias portas. Cun l'avertura da quest edifizis ha l'uniun purila contribuì senza insatge per in bun avegnir da l'agricultura grischuna. Fin a l'entschatta da matg sa chattavan ils biros da quatter instituziuns dals purs grischuns en quatter differents lieus. Uss en las administraziuns

da l'Uniun chantunala dals purs, «graubünden VIEH AG», la cussegliaziun purila regionala Tusang ed il Rintg da maschinas Grischun sut in tetg. Quella instituziun e da quellas quatter la pli giuvna è quella che vegn en l'avegnir ad avair anc dapli muntada per ils purs grischuns.

### 23 posts da lavur

Per la construcziun dal bajetg nov haja l'Uniun chantunala dals purs retschet sustegn dal chantun Grischun e da l'Agid svizzer da muntogna, ha ditg *Hansjörg Hassler*, il president dals purs grischuns. Ultra da quai haja l'uniun vendì ils biros a Cuira per 700 000 francs, quai che saja in bun pretsch. Quel nov center da cumpetenza per purs saja vegnì constrü sin l'iniziativa da «graubünden VIEH AG», in dals partenaris principals da l'uniun tetgala dals purs da noss chantun. En il nov center da cumpetenza a Cazas lavuran 23 persunas repartidas sin 12 biros. Ultra da quai stat er a disposiziun in stanza per sedutas per 16 persunas. L'intern dal nov edifizis è simpel, cler, emper-

naivel e senza luxus. Cun quel nov center da cumpetenza per purs dispona ussa l'Uniun purila grischuna d'in segund center dasper il «Plantahof» a Landquart. Quel duai er en l'avegnir restar il lieu per scolaziun e cussegliaziun, ha ditg *Hansjörg Hassler*, dentant ch'il center da cumpetenza a Cazas saja cler il lieu da servetschs per ils purs dal Grischun. Quel nov center da cumpetenza duai era purtar dapli vita en l'Arena a Cazas, in lieu che haja adina dapli impurtanza per l'agricultura da noss chantun. Ina da las hallas sin il plaz da l'Arena duai vegnir amplifitgada tar in edifizis multifunziunal per exposiziuns, lieu da trenadi per uniuns da sport ed in lieu per il militar. En l'avegnir duai er il restaurant da l'Arena avrir sias portas l'entir onn e betg mo sch'i ha lieu occurrenzas en l'areal da quella. *Curdin Foppa*, il manader dal servetsch da cussegliaziun dals purs, ha ditg che in tal center fettschia davairas senn, gist sche quatter instituziuns purilas possian collavurar pli stretg e profitar ferm cun avair lur biros sut in tetg.